



**TATACARA PEROLEHAN
UNIVERSITI**

BAB 12

**KETIDAKPATUHAN DALAM
PEROLEHAN UNIVERSITI**

Bahagian ini menerangkan mengenai tindakan tatatertib yang akan dikenakan ke atas individu, syarikat, firma perunding dan pertubuhan yang berdaftar dengan Kementerian Kewangan bagi kesalahan yang dilakukan oleh syarikat dan firma perunding.

1.0 TINDAKAN TATATERTIB KE ATAS SYARIKAT DAN FIRMA PERUNDING YANG BERDAFTAR DENGAN KEMENTERIAN KEWANGAN

1.1 Jenis-Jenis Kesalahan Yang Dilakukan Oleh Syarikat Dan Firma Perunding

1.1.1 Kesalahan Kerana Melanggar Syarat Pendaftaran

a. Memalsu Atau Meminda Maklumat/Dokumen

- i. Syarikat/Firma Perunding telah mengemukakan/ menggunakan maklumat palsu atau tidak benar dalam permohonan sama ada pendaftaran baru atau pembaharuan atau tambah bidang atau bagi tujuan pengiktirafan taraf pembuat;
- ii. Syarikat/Firma perunding telah memalsukan atau meminda apa-apa catatan di dalam Sijil Akuan Pendaftaran yang dikeluarkan oleh Kementerian Kewangan;
- iii. Syarikat/Firma perunding telah memalsukan pegangan ekuiti Bumiputera di dalam syarikat/ firma perunding dengan tujuan untuk mendapat taraf Bumiputera; atau
- iv. Premis syarikat/firma perunding tidak dapat dikesan/dijumpai semasa lawatan mengikut maklumat yang diisytiharkan dalam pendaftaran dengan Kementerian Kewangan.

b. Memperdaya Untuk Taraf Bumiputera

Syarikat yang telah diberi pengiktirafan Bumiputera berasaskan kepada dokumen yang dikemukakan, didapati tidak memenuhi syarat pengiktirafan pendaftaran taraf Bumiputera apabila dibuat pemeriksaan.

c. membenarkan Sijil Akuan Pendaftaran Digunakan Oleh Individu/Syarikat/Firma Perunding Lain

Syarikat/Firma perunding membenarkan Sijil Akuan Pendaftaran yang dikeluarkan oleh Kementerian Kewangan untuk digunakan oleh individu/ syarikat/firma perunding lain untuk apa-apa tujuan perolehan Kerajaan.

d. Gagal Mematuhi Syarat Pendaftaran

Syarikat/Firma perunding gagal memenuhi syarat/kriteria pendaftaran kod bidang yang ditetapkan iaitu:

- i. Gagal memenuhi syarat/kriteria pendaftaran kod bidang yang ditetapkan sepanjang tempoh sah pendaftaran; dan/atau
- ii. Syarikat/Firma perunding/individu gagal berdaftar dengan

Lembaga Profesional yang berkaitan atau badan kawal selia yang diiktiraf.

e. Gagal Mengemas Kini Maklumat Syarikat/Firma Perunding

Syarikat/firma perunding gagal mengemaskini apa-apa perubahan maklumat dalam Modul Pendaftaran Pembekal dalam tempoh 21 hari dari tarikh perubahan tersebut berlaku. Ini juga termasuk kegagalan syarikat/firma perunding mengemaskini pegangan ekuiti Bumiputera.

f. Tidak Memberi Kerjasama Dalam Hal-Hal Urusan Pendaftaran

Pemilik/Lembaga Pengarah/pengurusan syarikat/firma perunding tidak memberi kerjasama kepada pegawai Kementerian Kewangan dalam menjalankan tugas berkaitan dengan urusan pendaftaran.

1.1.2 Kesalahan Kerana Melanggar Syarat Tender/ Kontrak

Universiti hendaklah mentadbir kontrak dengan sempurna untuk memastikan syarikat/firma perunding memenuhi semua obligasinya di bawah kontrak yang ditandatangani. Sehubungan itu, Universiti hendaklah mengambil tindakan ke atas syarikat/firma perunding mengikut syarat-syarat kontrak sekiranya syarikat/firma perunding gagal memenuhi obligasinya. Selain daripada tindakan tersebut, kesalahan yang boleh diambil tindakan tatatertib adalah seperti berikut:

a. Pemalsuan Maklumat/Dokumen

Syarikat/Firma perunding telah memalsukan atau meminda apa-apa maklumat/sijil/dokumen yang berkaitan perolehan Universiti bagi memenuhi syarat yang ditetapkan untuk menyertai perolehan Universiti atau syarat kontrak.

b. Menarik Diri

Syarikat/Firma perunding yang telah pun menyertai perolehan Universiti seperti tender/sebut harga/e-Bidding yang dikeluarkan oleh Universiti tetapi menarik diri selepas penutupan tender/sebut harga/e-Bidding.

c. Menolak Tawaran

Syarikat/firma perunding enggan menerima atau menolak atau tidak memulangkan surat setuju terima tender/sebut harga/eBidding yang dikeluarkan oleh Universiti setelah tawaran dibuat.

d. Pakatan Harga

Syarikat/Firma perunding berpakat menentukan harga dengan syarikat/firma perunding lain ketika menyertai perolehan Universiti seperti tender/sebut harga/e-Bidding yang dikeluarkan oleh Universiti dengan tujuan mendapatkan harga yang tinggi atau untuk menjamin

syarikat/firma perunding tertentu sahaja memenangi tender/sebut harga/e-Bidding berkenaan.

e. Sub-Kontrak Atau Assignment

Syarikat/Firma perunding menyerah hak atau assign kepada syarikat/firma perunding lain tugas membekal, membuat atau menjalankan perkhidmatan untuk keseluruhan atau sebahagian daripada kuantiti kontrak/sebut harga/skop perkhidmatan yang diperolehi tanpa persetujuan terlebih dahulu daripada Universiti.

f. Gagal Mengekalkan Taraf Bumiputera Sepanjang Tempoh Kontrak Berkuatkuasa

Syarikat yang diberi taraf Bumiputera oleh Kementerian Kewangan dan telah ditawarkan kontrak tetapi kemudiannya tidak mematuhi/memenuhi syarat kriteria Bumiputera sepanjang tempoh kontrak.

g. Gagal Mematuhi Obligasi Kontrak/Pesanan Tempatan

Syarikat/Firma perunding telah gagal mematuhi obligasi kontrak/Pesanan Tempatan sama ada melibatkan satu (1) atau beberapa PTj. Kesalahan di bawah kegagalan mematuhi obligasi kontrak/ Pesanan Tempatan antaranya adalah seperti berikut:

i. Lewat Memberi Bekalan/Perkhidmatan

Syarikat/Firma perunding lewat menghantar bekalan atau lewat memberikan perkhidmatan mengikut tarikh yang ditetapkan dalam kontrak atau Pesanan Tempatan;

ii. Gagal Memberi Bekalan/Perkhidmatan

Syarikat/Firma perunding membekalkan barang-barang/memberikan perkhidmatan kurang dari segi kuantiti/perkhidmatan yang dipersetujui atau gagal membekalkan pesanan yang telah dibuat;

iii. Gagal Memberi Bekalan/Perkhidmatan Berkualiti

Syarikat/Firma perunding gagal membekalkan barang-barang/memberikan perkhidmatan yang berkualiti;

iv. Gagal Menepati Spesifikasi

Barang-barang atau perkhidmatan dibekal/ diberi oleh syarikat tidak menepati spesifikasi seperti mana yang dinyatakan dalam kontrak atau Pesanan Tempatan; dan

v. Gagal Menepati Terma Rujukan (TOR)/Skop Kerja Perunding

Bagi perkhidmatan perunding, output yang diberikan oleh firma perunding gagal menepati Terma Rujukan atau skop kerja yang ditetapkan.

vi. Kesalahan Berkaitan Kapasiti Firma Perunding

Kesalahan yang berkaitan dengan kakitangan firma perunding antaranya adalah seperti berikut:

- vi.i Firma perunding menghantar kakitangan yang kurang berpengalaman untuk berurusan dengan Universiti;
- vi.ii Firma perunding menggantikan perkhidmatan kakitangan yang diluluskan oleh Universiti dengan kakitangan lain tanpa kelulusan Universiti; dan
- vi.iii Firma perunding menggunakan perkhidmatan perunding asing tanpa kelulusan Universiti atau Perbendaharaan terlebih dahulu.

vii. Tidak Membuat Pembaharuan Pendaftaran

Syarikat/firma perunding masih mempunyai kontrak semasa dan tidak membaharui pendaftaran sebelum tamat tempoh pendaftaran. Kesalahan ini juga termasuk bagi firma perunding yang tidak membuat pembaharuan pendaftaran dengan Lembaga Profesional yang berkaitan atau badan kawalan yang diiktiraf.

1.1.3 Kesalahan Jenayah dan Tanggungan Sivil

a. Kesalahan Jenayah

Syarikat/firma perunding atau mana-mana ahli Lembaga Pengarah atau mana-mana ahli pengurusan telah melakukan jenayah dan disabitkan oleh mahkamah. Di antara kesalahan jenayah tersebut adalah rasuah, penipuan dan pecah amanah.

b. Tanggungan Sivil

Syarikat/Firma perunding telah mengalami tanggungan sivil seperti berikut:

- i. Syarikat/Firma perunding yang dikenakan perintah Penghutang Penghakiman (*Judgement Debtor*) termasuk penguatkuasaan yang dikeluarkan oleh mana-mana mahkamah yang mempunyai bidang kuasa;
- ii. Syarikat/pemilik/pengurusan yang telah diisytiharkan bankrap oleh mana-mana mahkamah; dan
- iii. Syarikat/firma perunding yang diletakkan di bawah perintah Penerimaan (*Receivership*) atau Pelikuidasi (*Liquidation*).

2.0 JENIS-JENIS TINDAKAN/HUKUMAN TATATERTIB

Jenis-jenis tindakan/hukumantatatertib yang boleh diambil oleh Kementerian Kewangan bagi jenis-jenis kesalahan di perenggan 1.1 di atas adalah seperti berikut:

2.1 Surat Amaran

Syarikat/firma perunding diberi surat amaran ke atas kesalahan yang telah dilakukan.

2.2 Batal Kod Bidang

Kod bidang yang telah diluluskan kepada syarikat/firma perunding boleh dibatalkan. Pembatalan ini akan menyebabkan syarikat/firma perunding tidak lagi boleh menyertai atau menerima tawaran dari Universiti bagi kod-kod bidang yang telah dibatalkan itu. Kesemua jenis bayaran pendaftaran yang telah dijelaskan oleh syarikat/firma perunding yang dibatalkan pendaftarannya tidak akan dipulangkan semula.

2.3 Gantung Pendaftaran

Syarikat/firma perunding boleh dikenakan tindakan gantung pendaftaran bagi tempoh maksimum sehingga lima (5) tahun dan dilarang daripada menyertai atau menerima apa-apa tawaran yang dikeluarkan oleh Universiti sepanjang tempoh penggantungan berkuat kuasa. Kesemua ahli Lembaga Pengarah dan pemilik modal (perseorangan/perkongsi) tidak dibenarkan untuk mendaftarkan syarikat baru dengan Kementerian Kewangan sepanjang tempoh tersebut.

2.4 Batal Pendaftaran

Pendaftaran syarikat/firma perunding boleh dibatalkan bagi tempoh maksimum sehingga lima (5) tahun dan nama syarikat/firma perunding akan dikeluarkan daripada rekod pendaftaran dengan Kementerian Kewangan termasuk disebabkan nama ahli-ahli Lembaga Pengarah disenaraihitamkan. Kesemua jenis bayaran pendaftaran yang telah dijelaskan oleh syarikat/firma perunding yang dibatalkan pendaftarannya tidak akan dipulangkan semula.

2.5 Pemilik Modal/Ahli Lembaga Pengarah Bagi Syarikat/Firma Perunding Disenaraihitamkan

Syarikat/Firma perunding yang mana pemilik modal atau ahli Lembaga Pengarah telah disenaraihitamkan yang memohon pendaftaran tidak akan didaftarkan sebagai syarikat/firma perunding yang boleh berurusan dalam perolehan Universiti. Sekiranya syarikat/firma perunding berkenaan telah sedia berdaftar, maka pendaftaran syarikat/firma perunding akan turut dibatalkan. Pemilik modal/ahli Lembaga Pengarah boleh disenaraihitamkan bagi tempoh maksimum sehingga lima (5) tahun.

2.6 Pembatalan Taraf Bumiputera/Pembuat

Taraf Bumiputera atau taraf pembuat boleh dibatalkan bagi tempoh maksimum sehingga lima (5) tahun apabila didapati syarikat tidak lagi memenuhi syarat/kriteria pendaftaran yang ditetapkan. Syarikat seterusnya tidak lagi layak dipertimbangkan untuk mendapat keutamaan yang diberikan kepada syarikat bertaraf Bumiputera/pembuat dalam perolehan Universiti.

3.0 TINDAKAN OLEH UNIVERSITI

- 3.1** Universiti hendaklah terlebih dahulu mengambil tindakan ke atas syarikat/firma perunding berkenaan mengikut terma dan syarat-syarat yang diperuntukkan dalam perjanjian kontrak. Universiti hendaklah memastikan pentadbiran kontrak dilaksanakan dengan cekap dan teliti. Aduan hanya boleh dikemukakan kepada Kementerian Kewangan selepas Universiti mengambil tindakan berdasarkan perjanjian kontrak. Universiti bertanggungjawab untuk segera melaporkan kepada Kementerian Kewangan mengenai syarikat/firma perunding yang melanggar syarat-syarat kontrak bagi membolehkan tindakan sewajarnya diambil.
- 3.2** Universiti hendaklah memastikan pendaftaran syarikat/firma perunding dengan Kementerian Kewangan adalah masih sah dan syarikat/firma perunding bebas daripada apa-apa tindakan/hukuman tatatertib di perenggan 2 di atas sebelum membenarkan syarikat berkenaan mengambil bahagian di dalam perolehan Universiti. Sehubungan itu, Universiti hendaklah menyemak Sijil Akuan Pendaftaran yang dikeluarkan oleh Kementerian Kewangan bagi syarikat/firma perunding berkenaan dengan merujuk kepada sistem ePerolehan untuk mengesahkan pendaftaran syarikat/firma perunding tersebut.
- 3.3** Universiti hendaklah memastikan syarikat adalah bebas daripada apa-apa tindakan/hukuman tatatertib semasa membuat pertimbangan bagi kontrak baru serta termasuk perubahan dan pelanjutan kontrak bagi kontrak yang sedang berkuatkuasa dengan syarikat/firma perunding berkenaan.

4.0 ADUAN OLEH UNIVERSITI/PENGADU

Universiti/pengadu hendaklah melaporkan kesalahan-kesalahan syarikat/firma perunding kepada Kementerian Kewangan. Aduan mengenai kesalahan tersebut hendaklah disertakan dengan bukti-bukti dan dokumen-dokumen yang menyokong bahawa kesalahan telah dilakukan oleh syarikat/firma perunding. Aduan berkenaan hendaklah dibuat melalui borang aduan dan dikemukakan ke Kementerian Kewangan.